

04 APR 1996

KONVENSYEN KEPIMPINAN GENERASI MUDA SABTU INI

KUALA LUMPUR, 4 April (Bernama) -- Pergerakan Pemuda Umno akan mengadakan satu Konvensyen Kepimpinan Generasi Muda Se-Malaysia, Sabtu ini di Dewan Tun Hussein Onn, Pusat Dagangan Dunia Putra (PWTC) di sini.

Pengerusi Biro Belia dan Siswazah pergerakan itu, Ruslan Kasim berkata objektif utama konvensyen itu adalah untuk menyediakan satu medium bagi mengumpulkan para pemimpin generasi muda dengan barisan pemimpin negara dan pemimpin belia di peringkat kebangsaan.

Antara tokoh belia yang akan hadir pada sesi dialog dan forum ialah bekas pemimpin mahasiswa tahun 1970-an Datuk Fuad Hassan, Presiden Kelab Penyokong Kerajaan Ruhanie Ahmad dan Exco Pergerakan Pemuda Umno Hishammuddin Tun Hussein, katanya pada satu persidangan berita di sini hari ini.

Beliau berkata tema bagi konvensyen itu ialah "Generasi Muda Pendukung dan Penggerak Wawasan Negara".

Konvensyen dua hari itu akan dirasmikan oleh Presiden Umno Datuk Seri Dr Mahathir Mohamad. Timbalan Presiden Datuk Seri Anwar Ibrahim akan turut hadir.

Sebanyak 1,000 orang dijangka menghadiri konvensyen itu. -- BERNAMA
WE AKD